

Seiqgyaiq Gizgiz Cungj Miz Gyaez

世界处处充满爱

武鸣县仙湖镇中桥小学六(2)班 卢云



Ndaej naengh youq ndaw gyausiz ronghsagsag haenx dingq lauxsae hwnjdangz, gou gamjdaengz vuenyungz; ndaej caeuq gyoengq doengz-hag itheij youq gwnz diegnywj guhangq, gou gamjdaengz vuenyungz; ndaej cing fwngz daxboh daxmeh youz gai, gou hix gamjdaengz vuenyungz. Hoeng, gienh saeh fatseng youq henzndang gou haenx, engq hawj gou roxnyinh gij feihdauh vuenyungz, neix couh dwg seiqgyaiq lengqlengq cungj miz gyaez!

Ranznden gou miz boux dahcej ndeu, heuh Banh Swhdngz, cib bi gaxgonq daxboh de dai lo, daxmeh vut de bae gizgyae haq lo, dahcej cijndei caeuq daxgoeng daxbuz nienzgeij laux lij miz bingh haenx itheij gvaq saedceij. Ndawranz gungz dwk haeux gwn cungj cadi mboujmiz, daxgoeng daxbuz gyangz naek gyangz naiq, caegcaeg uet raemxda, gyoengqde naeuz lij ndei miz dahlan iq neix,

mboujnex gyoengqde cungj mbouj siengj lix lo. Dahcej dwg gij maqmuengh daxgoeng caeuq daxbuz lix roengzdaej haenx.

Dahcej daengz nienzgeij hwnjhag lo, daxgoeng baenz ngoenz daiq bingh bae guh lingzgoeng ra ngaenz, doeng comz sae comz cij cengqgengz soengq de doeg daengz sam nienzgap, hoeng, 2004 nienz haggeiz daih' it caiqhix mboujmiz banhfap soengq dahcej hwnjhag lo. Daxgoeng cingq haenzmingh, ndaw hagdangz cienzdaej siusik ndei, guekgya saedhengz "song mienx it bouj" cwngecz: Daj ngoenzneix hwnj, gyoengq hagseng siujyoz caeuq cuhcungh doegsaw caiq hix mbouj yungh gyau ngaenzsaw caeuq ngaenz yozfei lo! Dahcej youh ndaej doegsaw lo. Hoeng liuh mbouj daengz, bihaenx seizhah, mbanjranz raeuz lienz doek sam ngoenz fwnhung, aen ranzciengz dahcej deng doemq lo, gyoengqde cijndei sien gyonj bae ranz

caencik youq. Ndaw mbanj goeng duicangj rox le, daengz cin minzcwnghban ra ngaenz bujcu, bang ranz dahcej hwnq liux song fungh ranz. Gyoengq caencik caeuq vunz ndaw mbanj lij soengq haeux caeuq doxgaiq ngoenzyungh daej, miz-mbangj lij soengq dengi caeuq gyahgi. Dahcej caeuq daxgoeng daxbuz de ndaej youq ranz moq, angq lumj gvaq cieng nei.

Dahcej baenz hwnj cuhcungh lo, daengz cuhcungh doegsaw aeu youq ndaw hag gwn youq, swnghhozfei bae gyawz ra ne? Couh yaek daengz haihag lo, daxgoeng de dawz gij doxgaiq ndawranz ndaej gai haenx cungj gai liux lo, lij comz mbouj ndaej geijlai ngaenz. Daengz ngoenz haihag lo, daxgoeng soengq dahcej bae daengz hagdangz, fwngz saenzdiddid dwk daj ndaw daeh mbon ok dieb ngaenz mbanjmben ndenq hawj lauxsae, naeuz: "Lauxsae, gou cijmiz di cienz neix lo, sien gyau dineix, mbouj gaeuq deq gvaqlaeng miz le caiq gyau, ndaej lwi?" Lauxsae riuyumyum dwk naeuz: "Daxgoeng, mbouj yungh gyau lo, seizneix guekgya mboujdanh mienx ngaenzsaw caeuq yozfei, gij hagseng ndawranz saedceij miz gunnanz haenx, lij ndaej ngaenz bujcu ne. Moix bi Nanzningz Si Cwngefuj cungj vih minz

banh saedsaeh, bued cienz roengzdaej coengh gij hagseng swnghhoz gunnanz haenx dem. Raeuz liujgaij daengz Banh Swhdngz miz gunnanz lo, de mboujdanh ndaej swnghhoz bujcu, raeuz lij coengh de swnhcingj gwnz sevei bangcoengh, daengzseiz lij miz gij vunz simndei daej bangcoengh....." "Caen mbouj yungh gyau lo?" Daxgoeng mbouj gamj saenq dujrwz cihgeij, raen lauxsae ngaekngaek gyaeu, daxgoeng angqdwk cig gangj: "Ndei ha! Ndei ha! Caen docih dangj caeuq guekgya lo! Caen docih gyoengq lauxsae sou lo! Swhdngz, mwngz aeu roengzrengz doegsaw, bauqdap aencingz dangj caeuq guekgya ha!" Dahcej hix angq dwk ngaekngaek gyaeu, "wng, daxgoeng, mwngz cuengqsim, gou itdingh roengzrengz hagsib, yungh cingzcik cei ndei daej bauqdap gyoengqde."

Dahcej caen mbouj hawj daxgoeng saetmuengh, de itcig roengzrengz hagsib, moix bi cungj ndaej haujlai ciengjang, seizneix dahcej gaeng daengz Vujmingz Gauhcungh doegsaw lo, de gangj: "Gou ndaej maj youq aen seiqgyaiq gizgiz cungj miz gyaez neix, gou itdingh ndeindei hagsib, baezlaeng vih gensez vuenyungz Cungguk okrengz."

(指导教师:刘孟婴)

Gangj Vah Ndawsim Hawj Daxboh Daxmeh

对爸爸妈妈说心里话

贵港市覃塘区芝公乡双龙小学五(1)班 陆丽娜



Daxboh daxmeh, sou ndei! Sou ciengx gou hung, sou sinhoj lo. Gou nyinhnaeuz gou maj baenz hung, ndaej hawj sou vaiqvued, caemh hawj sou aeuqheiq. Gou miz haujlai vah siengj gangj hawj sou.

Gou dwg boux lwgnyez gig dingqvah ndeu, moix baez sou mbouj youq ranz, gou cungj dwg gag guh gij saeh cihgeij. Geiq ndaej miz baez ndeu, daxboh miz saeh caengz dauqma, daxmeh hix gyaban, gou boux ndeu youq ranz guh cozyez sat le, sou caengz dauqma, seizhaenx gou gig dungxiek lo, couh cihgeij cawj ngaiz, gwn liux daih' it baez

ngaiz buenqndip mboujcug, doeklaeng anqseiz haeujninz. Sou dauqma, byaujyangz gou, seizhaenx gou ndawsim vaiqvued lumj rox mbin, doengxhwnz ninzndaek lij riu.

Gvaq caet bi le, sou couh son gou sauq ranz, swiq vanj. Seizneix gou rox guh haujlai hongranz, bang sou faendan hongranz. Dwg sou hawj gou bienqbaenz boux lwgnyez bouxboux gyaez byaujyangz he, docih sou.

Danhseih, sou mbouj hawj gou caeuq doengzhag guh baengzyoux, gangj dwg lau gou hag vaih. Gou mbouj laekgaek, gou rox faenbied saehcingz ndei rwix, sou cihgeij gap baengzyoux, gou vih gijmaz mbouj ndaej gap baengzyoux ne, nanzdauh gou youq ndawsim sou ciengxlwenx mbouj majhung ha? Maqmuengh sou hawj gou swyouz di, lai di lijgaij caeuq cihciz gou.

Daxboh daxmeh, gou itdingh guh boux lwgnyez gvai he, maqmuengh sou vuenyungz vaiqvued!

(指导教师:覃羽)

Yingbinsuh

应聘书

上林县大丰镇皇周小学四年级一班 黄天宝



Daihgya ndei! Gou dwg seiq nienzgaep 1 ban Vanz Denhbauj. Gou maij danz ganghinz, dwkgiuz daengj, daegbied gyaez doegsaw, saw son gou haujlai cihsiz, daegbied dwg faplwd cihsiz, gou rox haujlai faplwd cihsiz.

Gou simndat lumj feiz, moix dang doengzhag caeuq lauxsae aeu vunz bangfwngz seiz, gou cungj mbouj ngeix saek di bae bangcoh. Gou rox gangj, sij faenzcieng hix ndei, gou siengj ra aen vujdaiz daej fazveih gij caiznaengz gou, youh ndaej bangcoh doengzhag, baezneix "Yangzgvangh Gilwzsoj" ciu vunz, cingq hab gij siengjgap gou. Gou siengj baenz aen soj neix boux cwnzyenz ndeu, caj sou gij gienzik deng bovai seiz, gou aeu faplwd daej bangcoh sou; sou miz gijmaz saeh siengsim, gou nyinhcaen dingq, lij bang sou gajgez vwndiz. Danghnaeuz gou baezneix ndaej luzyungh, gou yaek cienz sim cienz eiq vih daihgya fuzvu, gou haenqrengz bangcoh sou, guh baengzyoux ndei sou.

Cingj caezgya cihciz gou, daeuzbiuq hawj gou, mboujnex sou couh lot boux caencingq bangcoh sou he lo! Docih daihgya!

(指导老师:潘月梅)

